

A Is K'anej Dios Bay Cham

SOFONÍAS

Is c'ual yowal c'ul Jehová

- 1** ¹ A ton wal jun k'anej ti' max yal Jehová bay Sofonías yet ayoc Josías, c'ajol Amón, yin reyal bay Judá. A Sofonías tu', c'ajol Cusi, cax is yitxiquin Gedalías, yichmam c'apax yayji Amarías c'al Ezequías.
- ² A wal caw Jehová chi alon axca ti': Ok wak' lajwok masanil tzet yetal ay bay sat tx'otx' ti'.
- ³ Ok wak' lajwok eb anima yetok no no', no tz'iquin, c'al yetok no txay. Ok wak' lajwok yobtakil yetok eb yobtakwom, cax ok wion el eb anima sat tx'otx' ti'.
- ⁴ Ok waoc yailal yin conob Judá, yetokc'al yin masanil eb cajan bay Jerusalén. Cax ok wak'on lajwok ay ayilal chi oc bay dios Baal bay conob ti'. C'amxa bay ok txclojcanok; toltax c'apax bi eb sacerdote ok in jo c'ayok.
- ⁵ Cax ok wak'on lajwok eb chi ajtok bay yibanlak na txajlok bay waycan, yetok eb chi ay jajan yin quin yak'on binajok; palta chi yak' binaj c'apax is diosal chi yik Milcom.
- ⁶ Ok wak'on c'apax lajwok eb chi pojil ba win, a ton eb c'am chi jayoc ayin Jehová in, yin ul k'anlen is nabal.
- ⁷ Numayanek in satak ayin Jehová Yajaw in ti', yujtol a c'ual yowal in c'ul cawilxa ay. Mayal in watx'nej el no xajanbal yet junc'ulalil. Mayal c'apax in sic'can el mac awtebil low wuj.
- ⁸ A yet jun c'ual tu', ok wawal oc yailal yiban eb yajaw yayji, yetokc'al yiban eb c'ajol rey, yetokc'al yiban juntzanxa eb chi yaoc pichil eb tx'ok conobal.
- ⁹ Ok wa c'apax oc yailal yiban eb comonc'al chi oc yulak na, a ton eb chi yak' noj yatut is patrón yuj beyomal chi yi eb yuj mak'wajwomal, c'al yuj etnewomal.

- 10 A yet jun c'ual tu', ok ablay yoc aw bay puertail yet no txay, bay yet is cab makan conob. Cax miman ok yun bil pojtok bay tzalanlak.
- 11 Awjanek, mac ex cajan ex bay jun makan bay ay txonbal, yujtol masanil eb txonjom ok cam eb, masanil eb chi ak'on tumin majanil, ok lajwok el eb.
- 12 A yet jun c'ual tu', ok in saywal wil Jerusalén axca chi yun saylay yetok tzeztebalej junok tzet yetal chi c'aytok. Ok waoc yailal yiban eb anima c'am tzet chi na' tinani', cax chi yalon eb yul yet axca ti': A Jehová, tok ay tzet yetal chi paktzej ayon yin watx'il, tamwal yin yatakilal, xi eb.
- 13 Yuj tu' xan a jantak is beyomal masanil, ok ilay ec'ok, c'al yatut eb ok uchlay ayok. Ok watx'nej aj eb yatut, palta manxanak eb ok cajay yul. Ok yaw eb is yuva, palta manxanak eb ok uq'uen vinoal an, xi Jehová.
- 14 Cawilxa ay jun c'ual yet yowal c'ul Jehová, caw wal miman yayji ocok. Cawilxa ay, yelc'ulalxac'al jayocok. Abek, a wal yet jun c'ual tu', toltax a eb soldado caw wal tec'an waayi, ok ok' eb yuj xiwc'ulal.
- 15 A wal yet jun c'ual tu', c'ual wal yowal c'ul Cham, yailal, c'al cusc'ulal. A yet tu', ok uchchajtok conob, tz'ininixac'al ok yuncanok. A yet tu' ok k'ekbok, k'ekk'olinaxac'al ok yunej. Moyanxac'al ok yunej. Caw wal pim ok yun yoc ewan.
- 16 A yet jun c'ual tu', c'ual xulay trompeta yuj owal c'al yel yaw eb soldado yak'on owal yin conob tol ayoc is murallail, c'al can ay aj is torreal.
- 17 Chi yalon Jehová axca ti': Ok wawal oc eb anima yin bilc'ulal, xan lajanxac'al ok yun yec'jab eb axca yec'jab eb c'amc'alta' chi ilwi, yujtol max oc wal yobtakilal eb in satak. A is chiq'uil eb, toxac'al ok pulcan ay axca aej; axa is mimanil eb, toxac'al ok aj can bulan axca tza' no no', xi Cham.
- 18 Tamwal yuj is plata eb anima, tamwal yuj ch'en yoro eb, ok colchaj eb yet jun c'ual yowal c'ul Jehová tu'. Yujtol a yowal c'ul Cham ok ak'on lajwok masanil nacionlak. Yin wal jun bekal ok lajwok ay masanil eb cajan bay yulyibank'inal ti', axca chi yun junok tzet yetal yuj k'ak'ej.
- 2** ¹ Ex conob tol c'am e q'uixawc'ulal, wajbajek oc e ba; naek wal e ba ² yet c'amto chi jayoc jun c'ual tol naanxa yuj Jehová, jun c'ual ayxa may yayji ocok, yet ok ex saklemcantok yuj, axca chi yun xulaytok matz'il trigo yuj cak'ek'.
- ³ Aek oc e ba yul k'ab Jehová e masanil, ex tol yaynakil che yut e ba yin e yiken tojolal bay yulyibank'inal ti'. Ajanek can yin tojolal

c'al yin yaynakilal, talaj chito ilchaj e colbalba yet c'ual yet yowal c'ul Jehová tu'!

Yailal ok cha nacionlak

- 4 Tz'ininixac'al ok yuncan conob Gaza, c'amxa mactxel ayic' bay Ascalón. C'ualil wali, cax chi uktelay eltok eb cajyom bay Asdod; axa pax eb cajan bay Ecrón xin, axcaxac'al tol ok oclay aj eb.
- 5 A wal ayex titnak ex bay Creta, mac ex tol cajan ex bay tilak a' mar, mayal yal Jehová tzet yetal ok jayoc e yiban. Chi yal axca ti': Ok wak' lajwok ay Canaán is tx'otx'al eb filisteo; c'amxa junok mactxel ok cajaycan ec' bay tu', xi Cham.
- 6 A masanil tx'otx' tilak a' mar, lobar calnelxac'al ok yuncanok. Axac'al bay tu' ok watx'nej eb ilom calnel is lanchú, c'al corral is calnel.
- 7 A eb okto iquisbokcan bay conobal Judá, ok yi eb satak bay tu'. A tu' ok yil eb is calnel; axa yet ak'balil, a bay nalak bay Ascalón ok way eb, yujtol a Jehová is Diosal eb, a' ok taynen eb, c'al yion aj can eb.
- 8 A wal Jehová Cham Yajaw yin Masanil, co Diosal ayon Israel on ti', a' chi aloni: Max wab wal is buchwal k'anej eb moabita, c'al eb amonita yin in conob, tol ok yiec' eb is tx'otx' yaloni.
- 9 Yuj tu', xan ayin wal caw chi wala', tol a Moab ti' lajan wal ok yun axca wal max yun Sodoma. Axa pax conob Amón xin, lajan wal ok yun axca conob Gomorra bay chi ch'ibaj te q'uix, c'al bay chi watx'ji aj atz'am. Tz'ininixac'al ok yuncan yin junelnej. A eb okto iquisbok can ec' bay in conob, a eb ok ion eltek is tzet yetal eb. A eb ok sataknenan is tx'otx'al eb tu', xi Jehová.
- 10 A ton wal paktzebal ok cha Moab c'al Amón ti' yuj is maynejbail, c'al yuj buchwal eb yin is conob Jehová Cham Yajaw yin Masanil.
- 11 Ayxa is may Jehová bay eb. Ok yak' lajwok comon dios bay masanil yulyibank'inal. Toltax a eb cajan bay k'axepaltok a' mar, a bay tu' ok oc eb ayilal bay Cham.
- 12 Yetok c'apax ayex ti', ex aj Etiopía, ok ex yasjoktok yuj yespada Jehová, cax ok ex ayc'ayok.
- 13 Ok yaon c'apaxtok Cham k'ab yin eb ay bay norte, yet chi yak' lajwok ay Asiria. Tz'ininixac'al ok yuncan conob Nínive yuj, takin tx'otx'xac'al ok yuncantok.
- 14 A bay tu' ok ayjok no jobbejal no', yetokc'al masanil no xolakilteal no'. Axac'al no tonton, yetok no xotx' ok ok' bay chonlak yoyal tu'; axac'al bay yulak wentena, ok bitnok eltek no'. Toxac'al ok ay wekan bay yulak ti puertail. A is chemteal ayoc yul, a ton te c'ute!, toxac'al ok can jakanok.

¹⁵ Axca tu' ok utlay jun conob c'am tzet chi na', caw wal chi yipc'ulnej ba, chi yalon eb cayjom bay, tol c'am junokxa conob lajan yetok. Palta tz'ininixac'al ok yuncanok, asanxanej no chiwajwom no' ok cajaycan ec' bay tu'. A mactxel ok ec' bay cawilal tu', ok buchwaj eb yin.

Is yobtakil Jerusalén c'al is colbanilal

- 3** ¹ A wal eb aj Jerusalén, tol caw wal tenomtak eb, yelxac'al yob eb, c'al etnewom eb.
- ² Maj wal cha yab eb tzet max yal Jehová, tamwal max cha c'ul eb yak'lay cuenta. Maj yaoc eb is Diosal yipok c'ul, tamwal max yaoc ba eb yul k'ab Cham.
- ³ A wal eb is yajawilal eb, lajan eb axca no coj chi el yaw yuj wajil. Axa eb is juezal eb, lajan wal eb axca no ok tol c'amxa junokxa bakil chibej no' chi yak'can yet junxa c'ual.
- ⁴ A eb chekbej Dios yaloni, chi maynej ba eb; yulc'al yet eb chi k'anjab. A eb sacerdote, chi yetnejtok eb cajlobal Dios, chi qu'exontok eb ley Cham.
- ⁵ Palta xin, ayic' Jehová bay conob tu'. Tojolec'al tzet yetal chi yun Cham. C'am tzet yetal man watx'ok chi yunej. Junjunc'al k'inibalil chi tx'oxil Cham is tojolal, axa pax eb yobtakwom xin, tamwal chito qu'ixwi eb.
- ⁶ Chi yalon Jehová axca ti': Mayal wuch lajwok nacionlak, mayal wuchay torre bay muralla. Tz'ininixac'al max wutcan bay yulak calle, c'amxa mac chi ec' bay tu'. A bay juntzan conob tu', c'amxa junok anima cajan.
- ⁷ Max in na': Talaj a eb aj Jerusalén ti' ay welapnok yul sat eb, yet chi wak'on cuenta eb. Ta axca tu', man ok wuchay cajlobal eb, tamwal waon oc yailal yiban eb axca in naoni, quin chi. Palta a eb xin, yelc'ulal max aj can eb yunen masanil pojanil yobtakilal.
- ⁸ Yuj tu xin, echbanejek jayoc jun c'ual yet ok in aj wan, yin in tx'oxon el is yobtakil masanil eb yobtakwom. Ayin wal caw Jehová in chi wala': Mayal in na' tol ok in wajbaj oc masanil nacionlak c'al makbejlak, yet ok wiel yowal in c'ul yiban eb. Masanil yulyibank'inal ok lajwok ayok yuj k'ak'al yowal in c'ul.
- ⁹ A wal yet ok apnok oc jun c'ual tu', ok in watx'nej oc k'anjab eb conob masanil, yet watx' masanil conob ok yal ba ayin, junxanej ok yun quin yak'on serbil eb.
- ¹⁰ A bay junxa k'axepaltok a' aej yet Etiopía, ok tit eb in conob sakleminak yayjicanok, ok jayoc eb ul yal ba ayin, c'al yiontek eb yofrenda.
- ¹¹ Ex in conob, a yet jun c'ual tu', manxa ok ex qu'ixwok yuj e yob beybalil, a ton bay max e pitnej e ba ayin. Yet tu' ok wiel eb chi

tzaløj yetok is ch'aanil e xol, c'amxa bak'in ok e maynej e ba bay tzalan, bay chi oc ayilal ayin.

- 12 Asanxanej eb anima chi yiay ba, c'al yaynakil chi yut ba, a' ok wak'can cajay bay in conob. Asanxanej win ok yaoc eb c'ul.
- 13 A eb aj Israel okto iquisbokcan ec'ok, manxa ok yun eb tzet yetal man tojolak, tamwal okto yak' eb lek'tial; c'amxac'al etnewomal ok yal eb, tol ok low eb, c'al xew eb yin c'am xiwc'ulalil, xi Jehovahá.

Bit yet tzalojc'ulal yuj Jerusalén

- 14 Bitnanek ex aj conob Sión, ajokab can e nuk' e bitni ex aj Israel. Tzalojanek ex aj conob Jerusalén, tzalojanek wali.
- 15 Mayal yican el Jehovahá yowal c'ul ayoc e yiban, mayal yintaknejcan el eb ajc'ul oc e yin. A Jehovahá Cham e Reyál ayic' e yetok. C'amxac'al bay ok ex xiwok.
- 16 A yet jun c'ual tu', ok al-lay bay eb aj Jerusalén axca ti': Ex aj Sión, c'amxac'al chex xiwi, c'amxaokabc'al chi pax yip e k'ab yuj xiwc'ulal.
- 17 A Jehovahá co Diosal ayic' jetok. A mayk'ak'al Cham chon coloni. Caw wal ok tzaløj Cham jetok. Yuj is camc'ulal jin, xan c'amxac'al tzet ok yala'. A yuj is tzalojc'ulal tu', xan ok bitnok Cham
- 18 axca chi yun yoc bit yet c'ual k'in, xi mi eb.

Chi yalon c'apax Jehovahá: Ok wiel ay mayil t'inan jayoc e yiban, ok wion c'apax el q'uixwilal chex oni.

- 19 A wal yet jun c'ual tu', ok wak' yowalil bay juntzan eb max ex etneni. Ok in colwaj bay eb yatak ay, c'al bay eb sakleminak cantok. Ok wi wal aj can e mimanbilal baytack'al max quex intaknelay elok.
- 20 A yet jun c'ual tu', ok ex witek ayex ti'. Ok ex in wajbaj ocok, cax ok in q'uexon tzet yetal ayoc e yiban. Ok wion wal aj can e mimanbilal, cax tol ay e yelapnok bay xol masanil conoblak bay yulyibank'inal ti'. Ok e yil wal ex wion aj can junelxa, xi Cham.